

# Službeni glasnik BiH, broj 95/16

Na osnovu člana 20. stav 2. tačka b) Zakona o kontroli kretanja oružja i vojne opreme ("Službeni glasnik BiH", br. 53/09 i 22/16), uz saglasnost Ministarstva unutrašnjih poslova Republike Srpske, ministarstava unutrašnjih poslova kantona i Policije Brčko distrikta BiH, ministar sigurnosti BiH donosi

## PRAVILNIK

### O NAČINU I POSTUPKU NADZORA I KONTROLE NAD PROVOĐENJEM ZAKONA O KONTROLI KRETANJA ORUŽJA I VOJNE OPREME

#### POGLAVLJE I - OPĆE ODREDBE

##### Član 1. (Predmet Pravilnika)

Ovim Pravilnikom propisuju se način i djelokrug provođenja nadzora i kontrole nad kretanjem oružja i vojne opreme (u daljem tekstu: naoružanje), subjekti nadzora i kontrole, postupci u slučaju utvrđenog prekršaja, način podnošenja izještaja o provedenom nadzoru i kontroli i obrazac zapisnika o izvršenom nadzoru i kontroli kretanja naoružanja.

##### Član 2. (Vršioci nadzora i kontrola)

(1) Nadzor nad provođenjem Zakona vrši Ministarstvo sigurnosti i organizacijske jedinice Ministarstva unutrašnjih poslova Republike Srpske, ministarstava unutrašnjih poslova kantona i Policije Brčko distrikta BiH (u daljem tekstu: organizacijske jedinice).

(2) Nadzorom i kontrolom državni službenici Ministarstva sigurnosti i službenici organizacijskih jedinica provjeravaju da li se prevoz naoružanja obavlja u skladu sa izdanim odobrenjem za kretanje naoružanja, shodno Zakonu.

(3) Ministar Ministarstva unutrašnjih poslova Republike Srpske, ministri ministarstava unutrašnjih poslova kantona i šef Policije Brčko distrikta BiH, dužni su da u roku od 15 dana od stupanja na snagu ovog Pravilnika, obavijeste Ministarstvo sigurnosti koja će organizacijska jedinica vršiti nadzor i kontrolu nad kretanjem naoružanja.

(4) Nadzor i kontrolu nad kretanjem naoružanja između entiteta, između entiteta i Brčko distrikta BiH ili

unutar entiteta provode državni službenici Ministarstva sigurnosti i uz saradnju službenika mjesno nadležnih organizacijskih jedinica ministarstava unutrašnjih poslova kantona, Ministarstva unutrašnjih poslova Republike Srpske i Policije Brčko distrikta BiH.

(5) Nadzor i kontrolu nad kretanjem naoružanja u slučaju uvoza, izvoza ili tranzita vrše državni službenici Ministarstva sigurnosti uz saradnju ministarstava unutrašnjih poslova kantona, Ministarstva unutrašnjih poslova Republike Srpske i Policije Brčko distrikta BiH. Ukoliko Ministarstvo sigurnosti ocjeni da je potrebno, u nadzor i kontrolu mogu se uključiti i službenici Uprave za indirektno oporezivanje BiH.

(6) Za vršenje nadzora i kontrole iz stava (4) i (5) ovog člana, Ministarstvo sigurnosti može ovlastiti nadležna ministarstva unutrašnjih poslova i Policiju Brčko distrikta BiH. Ukoliko nadzor obave službenici mjesno nadležnih organizacijskih jedinica, iste su obvezne o obavljenom nadzoru dostaviti jedan primjerak zapisnika Ministarstvu sigurnosti.

### **Član 3. (Provođenje nadzora)**

Osobe koje provode nadzor moraju ga provoditi:

- stručno, nepristrano i na način da što manje ometaju normalan proces rada,
- da komuniciraju na jasan i nedvosmislen način,
- da objektivno ocjenjuju i izvještavaju,
- da poštuju osobnost i privatnost nadziranih osoba.

### **Član 4. (Vrijeme vršenja nadzora i kontrole)**

(1) Nadzor se vrši na osnovu:

- a) plana rada (godišnji, mjesecni);
- b) odluke rukovodioca organa.

(2) Nadzor i kontrola može biti redovan ili vanredan.

(3) Vanredni nadzor vrši Ministarstvo sigurnosti u saradnji sa entitetskim i kantonalnim ministarstvima unutrašnjih poslova i Policijom Brčko distrikta BiH na osnovu ovlaštenja ministra sigurnosti.

## **POGLAVLJE II - NAČIN I MJESTO VRŠENJA NADZORA I KONTROLE**

### **Član 5.**

#### **(Uvid u pravilnost primjene odredaba Zakona koje se odnose na kretanje naoružanja unutar BiH)**

(1) U cilju pravilne primjene odredaba Zakona koje se odnose na kretanje naoružanja unutar BiH, državni službenik Ministarstva sigurnosti ili ovlaštena osoba može da u institucijama koje su nadležne za izdavanje odobrenja za kretanje naoružanja unutar BIH neposredno:

- izvrši uvid u način vođenja propisanih evidencija,
- izvrši uvid u način obrade zahtjeva za izdavanje odobrenja za kretanje naoružanja, te broju izdatih i odbijenih zahtjeva za kretanje naoružanja,
- izvrši uvid o načinu izvještavanja o provedenom nadzoru i kontroli.

(2) Zapisnik o izvršenom uvidu u rad institucija nadležnih za izdavanje odobrenja za kretanje naoružanja unutar BIH, dostavlja se rukovodiocu organa nad čijim radom je izvršen uvid u smislu stava (1) ovog člana.

### **Član 6.**

#### **(Nadzor i kontrola kretanja u slučaju uvoza/izvoza/tranzita)**

Državni službenik Ministarstva sigurnosti, u slučaju prelaska naoružanja preko državne granice (uvoza/izvoza/tranzita) u dogovoru sa službenicima mjesno nadležne organizacijske jedinice utvrđuje kada i gdje će se vršiti kontrola prevoza naoružanja. Način vršenja kontrole i nadzora u slučaju (uvoza/izvoza/tranzita) naoružanja propisan je člankom 10. ovog Pravilnika.

### **Član 7.**

#### **(Način vršenja nadzora i kontrole)**

(1) Nadzorom i kontrolom treba utvrditi da li se prevoz obavlja u skladu sa izdatim odobrenjem.

(2) Na zahtjev službenika koji vrši kontrolu, vozač je dužan dati na uvid dokumentaciju koja se odnosi na prevoz naoružanja (odobrenje za prevoz, tovarni list, otpremnica, te u slučajevima da naoružanje sadrži opasne materije i certifikat za prevozno sredstvo i članove posade prevoznog sredstva i pisano upustvo o poduzimanju posebnih mjera), dozvoliti pregled prevoznog sredstva, opreme i tereta na prevoznom sredstvu na licu mjesta, odnosno na odgovarajućem mjestu koje odredi državni službenik Ministarstva sigurnosti ili službenik organizacijske jedinice koji obavlja kontrolu.

(3) O izvršenoj kontroli prevoznog sredstva koje prevozi naoružanje, državni službenik Ministarstva sigurnosti ili službenik organizacijske jedinice dužan je sačiniti zapisnik. Obrazac zapisnika sačinjen je na obrascu broj 1. koji je sastavni dio ovog Pravilnika.

(4) Nakon obavljenе kontrole jedan primjerak zapisnika se uručuje vozaču.

(5) U slučaju nove kontrole tokom istog prevoza vozač mora pokazati zapisnik o izvršenoj kontroli.

## **POGLAVLJE III - POSTUPCI U SLUČAJU UTVRĐENOG PREKRŠAJA**

### **Član 8.** **(Postupci u slučaju prekršaja)**

(1) Ako se u toku nadzora i kontrole kretanja naoružanja utvrdi da je počinjen prekršaj koji je propisan u članu 19. Zakona, državni službenik Ministarstva sigurnosti ili službenik organizacijske jedinice koji je vršio nadzor i kontrolu sačinjava zapisnik. Zapisnik o izvršenom nadzoru i kontroli dostavlja se Ministarstvu sigurnosti na dalje postupanje.

(2) Na osnovu zapisnika o izvršenom nadzoru i kontroli nad prevozom naoružanja, kojim je utvrđeno postojanje prekršaja iz člana 19. Zakona, Ministarstvo sigurnosti pokreće prekršajni postupak u skladu sa Zakonom o prekršajima BiH.

### **Član 9.** **(Poduzimanje odgovarajućih mjera)**

(1) Ako državni službenik Ministarstva sigurnosti ili službenik organizacijske jedinice prilikom vršenja nadzora i kontrole, utvrdi da je počinjen prekršaj iz člana 19. Zakona, može privremeno zabraniti daljnji nastavak kretanja, odrediti mjere za otklanjanje nepravilnosti, odnosno primijeniti druge sigurnosne mjere (naložiti pratnju policije, naložiti obvezan pravac kretanja i sl.). Nedostaci se otklanjaju na licu mjesta ako se time ne ugrožavaju ljudi, materijalna dobra ili okoliš.

(2) U slučaju određivanja mjera na licu mjesta vozaču se mora objasniti koji je prekršaj utvrđen i koje je nedostatke vozač dužan otkloniti da bi mogao nastaviti s kretanjem.

(3) Tokom trajanja privremene zabrane prevoza, vozilo je moguće premjestiti samo u skladu sa uputstvom službenika koji vrši nadzor i kontrolu. U slučaju eventualnog kršenja naredbe o privremenoj zabrani prevoza, odnosno izrečenih mjera, državni službenik Ministarstva sigurnosti ili službenik organizacijske jedinice ima pravo spriječiti nastavak prevoza na način da prevozno sredstvo isključi iz prometa, te da ga na račun prevoznika zadrži na odgovarajućem i osiguranom mjestu ili da ga vrati na početno odredište o trošku organizatora.

(4) U slučaju da državni službenik Ministarstva sigurnosti ili službenik organizacijske jedinice koji vrši kontrolu za nastavak kretanja naloži obveznu pratnju policije, troškove pratnje snosi organizator prevoza.

## **POGLAVLJE IV - PRIJELAZNE I ZAVRŠNE ODREDBE**

**Član 10.**  
**(Prestanak važenja ranijeg Pravilnika)**

Stupanjem na snagu ovog Pravilnika, prestaje da važi Pravilnik o načinu i postupku nadzora i kontrole nad provođenjem zakona o kontroli kretanja oružja i vojne opreme ("Službeni glasnik BiH" broj 93/09).

**Član 11.**  
**(Saradnja sa drugim organima)**

U svrhu provođenja odredaba ovog Pravilnika Ministarstvo sigurnosti i ovlaštene organizacijske jedinice, u okviru svojih nadležnosti, surađuju sa drugim državnim organima, bezbjednosnim agencijama i međunarodnim organizacijama kojima u skladu s preuzetim obvezama Bosne i Hercegovine dostavlja odgovarajuće podatke.

**Član 12.**  
**(Stupanje na snagu)**

Ovaj Pravilnik stupa na snagu danom donošenja i objavit će se u "Službenom glasniku BiH".

Broj 12-04-7-2578/16-49  
07. decembra 2016. godine  
Sarajevo

Ministar  
**Dragan Mektić**, s. r.